

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-286/20
Sarajevo, 27.2.2020. godine

Z A P I S N I K
**5. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 13. i 27. 2. 2020. godine**

Sjednica je počela sa radom u 11.25.

Sjednicom je predsjedao Tomislav Martinović, predsjedatelj Doma naroda Parlamenta Federacije Bosne i Hercegovine.

Predsjedatelj je pozdravio izaslanike, predstavnike Vlade Federacije Bosne i Hercegovine te predstavnike medija.
Izočnost sjednici je opravdala Mirela Trepanić.

Prema evidenciji Stručne službe, sjednici nazoče 52 izaslanika što čini većinu pa Dom naroda može raditi i punovažno odlučivati.

Potom se prešlo na glasovanje o zapisnicima.

Na temelju rezultata glasovanja, predsjedatelj je konstatirao da je Dom naroda Parlamenta Federacije BiH bez primjedbi, sa 49 glasova za i jednim suzdržanim glasom usvojio Zapisnik 4. sjednice Doma naroda Parlamenta FBiH održane 19.12. 2019. i 23.1. 2020. godine.

Na temelju rezultata glasovanja, predsjedatelj je konstatirao da je Dom naroda Parlamenta Federacije BiH bez primjedbi, sa 47 glasova za usvojio Zapisnik 3. izvanredne sjednice Doma naroda Parlamenta FBiH održane 19.12. 2019. godine.

Potom je predsjedatelj podsjetio izaslanike da temeljem članka 104. Poslovnika o radu Doma naroda Parlamenta Federacije Bosne i Hercegovine ukoliko žele mogu postavljati izaslanička pitanja ili pokretati inicijative.

Izaslanička pitanja i inicijative

Rasim Kantarević je pitao premijera Vlade FBiH zašto se ne poduzimaju adekvatne mjere protiv odgovornih, onih koji ne provode ove mjere, te ako se ne provode presude Ustavnog suda kako i na koji način osigurati jednakost pred zakonom i poštivanje ustavne odredbe.

Boris Krešić je postavio tri pitanja.

Prvo pitanje je upućeno Federalnom ministarstvu zdravstva u vezi presude Ustavnog suda U-61/17, odnosno pitanje da li je Federalno ministarstvo zdravstva uputilo akt

svim kantonalnim ministarstvima zdravstva da se, u skladu sa navedenom presudom, djetetom smatra svaka osoba od rođenja do punoljetstva kao da su mu pružena ista prava iz zdravstvenog osiguranja i zdravstvene zaštite kao zdravstveno osiguranoj djeci bez obzira na njihov status i činjenicu da li su učenici osnovnih škola.

Drugo pitanje je upućeno Federalnom ministarstvu pravde FBiH u vezi presude Ustavnog suda U-22/16, a ono glasi: Koja se forma ugovora zahtjeva za promet nekretnina te na koji način uknjižiti pravo vlasništva u zemljišnim knjigama uzimajući u obzir članke 3. i 42. Zakona o zemljišnim knjigama Federacije BiH?

Treće pitanje upućeno je Federalnom ministarstvu financija: Šta je, prema Zakonu o porezu na dohodak, u smislu stavka 5. članka 24. istog zakona, dokaz o izdržavanju djeteta čiji roditelji nisu u braku i kojima presudom suda nije određeno plaćanje alimentacije?

Damir Marjanović je postavio dva pitanja i pokrenuo jednu inicijativu.

Prvo pitanje je upućeno svim vladama FBiH - Na temelju kojeg zakona i legislative je sada reguliran naučnoistraživački rad u FBiH? U vezi sa ovim pitanjem pokrenuo je i inicijativu prema Vladi FBiH da po hitnom postupku izradi Zakon o naučnoistraživačkoj djelatnosti u FBiH.

Drugo pitanje upućeno je predsjedavajućem Doma naroda, a ono glasi: Kada će se na sjednici Doma naroda razmatrati Prijedlog Zakona o zaštiti okoliša?

Dževad Hadžić je postavio dva pitanja.

Prvo pitanje postavljeno je Federalnom ministarstvu zdravlja, a glasi: U koliko je univerzitetskih kliničkih centara Federacija preuzela osnivačko pravo, te koje su to zdravstvene ustanove kao i zašto ne konzumira pravo u nekoj zdravstvenoj ustanovi u kojoj je preuzela to osnivačko pravo?

Drugo pitanje je postavljeno Federalnom ministarstvu za izbjegla i raseljena lica - Koliko je ovo ministarstvo u zadnjem mandatnom periodu uložilo sredstava na ime povratka, tražim da se ta sredstva prikažu po strukturi u smislu općina u koje su uložena, da se prikažu po strukturi u smislu projekata koji su bili infrastrukturne prirode, te koliko je uloženo na povratke održivog povratka?

Ivan Ivić postavio je pitanje nadležnoj carinskoj službi BiH - Zašto nije isto postupanje o svim carinskim upravama odnosno carinskim ispostavama pri carini izvoza drvene građe, zašto carinske ispostave koje pripadaju Upravi Mostar za podnošenje zahtjeva za carinjenje izvoza drvene građe uvjetuju podnošenjem takozvanog uvjerenja o kratkoći dok druge carinske službe to ne traže?

Zdenka Džambas je postavila dva pitanja.

Prvo pitanje se odnosi na dostavljanje spiska svih institucija koje kontrolira FBiH, direkcija, agencija i ostalo, ko su njihovi direktori, ko su njihovi rukovodeći državni službenici, koliko ima žena.

Drugo pitanje je upućeno Federalnom ministarstvu turizma i okoliša: Gdje je 10 odlagališta na koja se odlaže radioaktivni materijal na području BiH?

Damir Džeba postavio je pitanje Parlamentu FBiH: Zašto Parlament FBiH, i pored proteka prekluzivnog roka iz Zakona o koncesijama FBiH, nije imenovao komisiju za koncesije Federacije BiH?

Senad Čeljo je postavio pitanje premijeru Vladi FBiH i Federalnom ministarstvu energije, rudarstva i industrije koje glasi: Da li Vlada FBiH planira privatizaciju većinskog vlasništva udjela kapitala u privrednim subjektima namjenske industrije u FBiH?

Vibor Handžić je pokrenuo inicijativu u vezi projekta „Rekonstrukcija kolektora Bjelašnica - Hadžići“.

Aner Žuljević je postavio tri pitanja i pokrenuo jednu inicijativu.

Prvo pitanje je upućeno Tužiteljstvu FBiH: Da li je i koliko puta pokrenut postupak u vezi nepoštivanja Odluke Ustavnog suda Federacije? Od Ustavnog suda Federacije zatražio je i informaciju o broju neimplementiranih presuda.

Drugo pitanje postavio je Vladi FBiH sa zahtjevom da se dostavi pregled javnih poduzeća u kojima Vlada FBiH vrši ovlaštenja u kojima su imenovani vršitelji dužnosti, bilo upravnog odbora, nadzornog odbora ili članova uprave, te koliko vremena to traje po pojedinačnom poduzeću.

Treće pitanje je upućeno Agenciji za bankarstvo FBiH: Tražim da mi se dostavi pregled svih pojedinačnih naknada koje se naplaćuju korisnicima usluga u bankama te promjene njihovih pojedinačnih iznosa u zadnje četiri godine? U sklopu ovog pitanja podnosi i inicijativu prema Vladi FBiH za donošenje Zakona o uporedivosti naknada prebacivanja računa za plaćanje i pristupa osnovnom računu.

Segmedina Srna-Bajramović je postavila tri pitanja.

Prvo pitanje je upućeno Poreznoj upravi FBiH i Federalnom zavodu za statistiku i glasi: Tražim da mi se na temelju podataka iz Jedinstvenog sistema registracije, kontrole i naplate doprinosa dostavi koliko je od stupanja na snagu novog Zakona o radu prijavljeno zaposlenih na neodređeno, a koliko na određeno, koliko uposlenih nakon 2015. godine imaju neprekidno trajanje uplata doprinosa, bez prekida duže od tri godine?

Zatražila je i da joj se, na temelju obračuna sredstava u zdravstvu, dostave podaci koliko je u 2017., 2018. i 2019. godini ukupno utrošeno novca u javnim zdravstvenim ustanovama, a koliko su građani zbog nemogućnosti ostvarivanja usluge u javnom zdravstvu uplatili privatnim zdravstvenim ustanovama.

Također, tražila je i pojašnjenje potrebe kupovine objekta za trajni smještaj Fonda za zaštitu okoliša u iznosu od šest miliona KM, dok istovremeno postoje veliki problemi sa aerozagađenjem i drugi problemi iz zaštite okoliša poput deponije Uborak, Smiljevići, zagađenja rijeka i tome slično.

Ramo Isak je postavio pitanje Ministarstvu unutrašnjih poslova FBiH i tužiteljstvu, šta planira uraditi povodom pojave lažnih Facebook profila „saliveni“ i „čaršija Zenica“ koji napadaju, vrijeđaju i omalovažavaju ljude te pozivaju na nacionalnu mržnju.

Mladen Simić je postavio pitanje Poreznoj upravi Federacije koje glasi: „Koliki tačno iznos duguje Javno komunalno preduzeće Zenicatrans prijevoz putnika d.d. Zenica na ime poreznih obaveza, koje su strukture i šta se preduzelo po pitanju naplate istih od dana kada su nastale obaveze pa do danas, odnosno da se objasni i obrazloži postupak prinudne naplate kako za JP Zenicatrans tako i za ostale dužnike, te da li je, u smislu člana 33. Pravilnika o procedurama prisilne naplate poreznih obaveza, prije izdvajanja naloga za plaćanje poreznih obaveza broj: 13-4-01-15-25-1778/19 od 6.2.2020. godine provedena procedura prikupljanja činjenica i dokaza za utvrđivanje

solidarne odgovornosti Grada Zenica po pitanju poreznih obaveza, ako jeste, da li je doneseno rješenje kao upravni akt sa mogućnošću pravnog lijeka na isto, a kako to zakon i navedeni Pravilnik predviđa odnosno je li to isto donio sud ili je Porezna uprava svojim unutrašnjm aktom donijela isto.“

Igor Stojanović je postavio pitanje Federalnom ministarstvu okoliša i turizma kao i Federalnoj upravi za inspeksijske poslove. Pitanje glasi: „Molim za informaciju šta je Federalno ministarstvo okoliša i turizma te Federalna uprava za inspeksijske poslove poduzela po pitanju nadzora nad emisijom industrijskih postrojenja snage preko 50 kilovatsati za koje su okolinske dozvole izdate na federalnom nivou naročito u Kantonu Sarajevo kao području koje je imalo i najgore rezultate mjerenja kvaliteta zraka i šta se desilo sa zahtjevom Kantonalnog ministarstva prostornog uređenja, građenja i zaštite okoliša za inspeksijske nadzore Kantona Sarajevo, dakle, da li se udovoljilo zahtjevu i da li je poduzeta bilo kakva aktivnost?“

Hadis Jusić je postavio pitanje Ministarstvu sigurnosti BiH koje glasi: „Da li Ministarstvo financija ima podatak koliko je tih sredstava povučeno iz međunarodnih fondova koji djeluju na području Krajine povodom migrantske krize, te da li je zapostavljena sigurnosna komponenta tog problema budući da prevladava humanitarna komponenta?“

Nakon postavljenih izaslaničkih pitanja i inicijativa, prešlo se na utvrđivanje dnevnog reda.

Predsjedatelj je izvjestio izaslanike da Kolegij Doma naroda Parlamenta FBiH predlaže da se u dnevni red 5. sjednice uvrsti Prijedlog zakona o izmjenama i dopunama Zakona o porezu na dobit s prijedlogom da se isti razmatra po žurnom postupku.

Prijedlog zakona o izmjenama i dopunama Zakona o porezu na dobit je po žurnom postupku usvojio Zastupnički dom Parlamenta Federacije BiH na 7. izvanrednoj sjednici održanoj 29.1.2020. godine.

Na temelju rezultata glasovanja, predsjedatelj je konstatirao da Dom naroda Parlamenta Federacije BiH nije prihvatio ovaj prijedlog, jer prijedlog nije dobio potrebitu većinu glasova izaslanika.

Predsjednik Kluba hrvatskih izaslanika Ivo Tadić je izrazio sumnju u rezultate glasovanja te zatražio pojedinačno glasovanje.

Tajnik Doma naroda Izmir Hadžiavdić izvršio je poimenično izjašnjavanje.

Na temelju rezultata poimeničnog izjašnjavanja, predsjedatelj je konstatirao da je Dom naroda Parlamenta FBiH sa 35 glasova za, pet suzdržanih glasova i 12 glasova protiv, prihvatio da se u dnevni red današnje sjednice uvrsti Prijedlog zakona o izmjenama i dopunama Zakona o porezu na dobit.

Kolegij Doma naroda predložio je da se u današnji dnevni red, kao posljednja tačka, uvrsti Izbor i imenovanja.

Na temelju rezultata glasovanja konstatovano je da je Dom naroda sa 31 glasom za, 5 suzdržanih glasova i 5 glasova protiv, prihvatio prijedlog Kolegija da se u današnji dnevni red uvrsti kao posljednja tačka: Izbor i imenovanje.

Na temelju rezultata glasovanja, predsjedatelj je konstatirao da je Dom naroda Parlamenta FBiH sa 37 glasova za, četiri suzdržana glasa i pet glasova protiv, prihvatio da se Prijedlog Zakona o visini stope zatezne kamate razmatra po žurnom postupku.

Na temelju rezultata glasovanja, predsjedatelj je konstatirao da je Dom naroda Parlamenta FBiH sa 36 glasova za, tri suzdržana glasa i osam glasova protiv, prihvatio da se Prijedlog Zakona o izmjenama i dopunama Zakona o porezu na dobit razmatra po žurnom postupku.

Zatim je predsjedatelj stavio na glasovanje predloženi dnevni red i na temelju rezultata glasovanja, konstatirao da je Dom naroda Parlamenta Federacije Bosne i Hercegovine sa 39 glasova za i 10 suzdržanih glasova usvojio sljedeći

DNEVNI RED

1. Prijedlozi zaključaka koji proizlaze iz presuda Ustavnog suda Federacije Bosne i Hercegovine i Ustavnog suda Bosne i Hercegovine broj: U-6/19 od 4.10.2019. godine, U-25/19 od 3.12.2019. godine, U-27/19 od 3.12.2019. godine, U-28/19 od 3.12.2019. godine, U-36/18 od 12.11.2019. godine,
2. Prijedlog odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine,
3. Prijedlog zakona o visini stope zatezne kamate - žurni postupak,
4. Prijedlog zakona o izmjenama i dopunama Zakona o porezu na dobit - žurni postupak,
5. Prijedlog zakona o obrtu i srodnim djelatnostima u Federaciji Bosne i Hercegovine,
6. Nacrt zakona o elektronskom potpisu,
7. Nacrt zakona o izmjenama i dopunama Zakona o gospodarskim društvima,
8. Nacrt zakona o podršci porodicama sa djecom u Federaciji Bosne i Hercegovine,
9. Nacrt zakona o reprezentativnosti sindikata i udruga poslodavaca,
10. Izvješće o odobravanju izdvajanja sredstava iz Tekuće rezerve Vlade Federacije Bosne i Hercegovine za 2019. godinu za razdoblje 1.1.2019.-1.6. 2019. godine sa:
 - a) tabelarnim pregledom odluka o odobravanju sredstava iz „Tekuće rezerve Vlade Federacije BiH“ Budžeta Federacije Bosne i Hercegovine za 2019. godinu za razdoblje 1.1.2019. - 30.6.2019. godine,
 - b) tabelarnim pregledom rješenja o izdvajanju sredstava iz „Tekuće rezerve premijera i zamjenika premijera“ Budžetu Federacije Bosne i Hercegovine za 2019. godinu za razdoblje 1.1.2019. - 30.6.2019. godine
 - c) tabelarnim pregledom odluka o izdvajanju sredstava iz „Tekuće rezerve Vlade Federacije BiH“ Proračuna Federacije Bosne i Hercegovine za 2019. godinu za razdoblje 1.1.2019.-30.6.2019. godine po proračunskim korisnicima,

11. Izvješće o poslovanju BH Gas d.o.o. Sarajevo za 2017. godinu i Izvješće o poslovanju BH Gas d.o.o. Sarajevo za 2018. godinu,
12. Godišnje izvješće o poslovanju JP Ceste Federacije BiH d.o.o. Sarajevo za 2018. godinu,
13. Godišnje izvješće Visokog sudbenog i tužiteljskog vijeća Bosne i Hercegovine za 2018. godinu,
14. Izbori i imenovanja.

1. Prijedlozi zaključaka koji proizlaze iz presuda Ustavnog suda Federacije Bosne i Hercegovine i Ustavnog suda Bosne i Hercegovine broj: U-6/19 od 4.10.2019. godine, U-25/19 od 3.12.2019. godine, U-27/19 od 3.12.2019. godine, U-28/19 od 3.12.2019. godine, U-36/18 od 12.11.2019. godine

Parlamentu Federacije BiH su od strane Ustavnog suda Federacije BiH dostavljene presude: U-25/19, U-27/19, U-28/19 i U-36/18. Ove presude su također dostavljene i mjerodavnim radnim tijelima koja su iste razmatrala.

Izvršenje presude broj U-25/19 od 3.12.2019. godine odnosi se na Prijedlog zakona o izmjeni Zakona o matičnim knjigama koji se nalazi u parlamentarnoj proceduri.

Presuda broj U-6/19 od 4.10.2019. godine odnosi se na Zakon o visini stope zatezne kamate, a kako se isti nalazi pod tačkom dva dnevnog reda usvajanjem istog bi bila provedena ova presuda suda.

U pretresu nije nitko sudjelovao.

Na temelju rezultata glasovanja, predsjedatelj je konstatirao da je Dom naroda Parlamenta FBiH sa 46 glasova za i dva suzdržana glasa usvojio sljedeći

ZAKLJUČAK

Zadužuje se premijer Federacije BiH da u skladu sa Ustavom Federacije BiH osigura izvršenje presuda Ustavnog suda Federacije broj: U-25/19 od 3.12.2019. godine i U-6/19 od 4.10.2019. godine.

2. Prijedlog odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine

Prijedlog Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine utvrdili su predsjedatelj i potpredsjedatelj Doma naroda.

Prijedlog zakona su razmatrala mjerodavna radna tijela i dostavila svoja izvješća.

Potpredsjedatelj Aljoša Čampara je obrazložio Prijedlog odluke.

U ime Povjerenstva za izbor i imenovanje govorio je Ivo Tadić.

U pretresu su sudjelovali: Igor Stojanović, Ivo Tadić, Goran Broćeta, Slađan Ilić, Jasmin Duvnjak, Aljoša Čampara, Aner Žuljević, Damir Džeba i Zvonko Marić.

Usljediла je stanka u trajanju od 30 minuta.

Na temelju rezultata glasovanja predsjedatelj je konstatirao da je Dom naroda Parlamenta Federacije Bosne i Hercegovine jednoglasno sa 46 glasova donio Odluku o izboru predsjednika, zamjenika predsjednik i članova radnih tijela Doma naroda Parlamenta Federacije BiH.

3. Prijedlog Zakona o visini stope zatezne kamate - žurni postupak

Prijedlog Zakona o visini stope zatezne kamate je utvrdila Vlada Federacije.

Zastupnički Dom Parlamenta Federacije Bosne i Hercegovine je na 10. sjednici održanoj 29.01.2020. godine usvojio Prijedlog Zakona o visini stope zatezne kamate u tekstu kako ga je predložila Vlada Federacije BiH.

Prijedlog Zakona o visini stope zatezne kamate je obrazložila predstavница Federalnog ministarstva financija Mira Bradara.

Na Prijedlog zakona Vibor Handžić je podnio Amandman koji se odnosi na članak 3. stavak 2. Prijedloga zakona.

Vlada Federacije je dostavila Izjašnjenje kojim ne prihvata Amandman.

Prijedlog zakona su razmatrala mjerodavna radna tijela i dostavila svoja izvješća.

U pretresu su sudjelovali : Žarko Vujović, Damir Marjanović, Vibor Handžić i Ivo Tadić.

Vibor Handžić je izjavio da odustaje od Amandmana.

Na temelju rezultata glasovanja predsjedatelj je konstatirao da je Dom naroda Parlamenta Federacije Bosne i Hercegovine sa 33 glasa za, osam suzdržanih glasova i dva glasa protiv usvojio Prijedlog Zakona o visini stope zatezne kamate.

4. Prijedlog zakona o izmjenama i dopunama Zakona o porezu na dobit - žurni postupak

Prijedlog zakona o izmjenama i dopunama Zakona o porezu na dobit je utvrdila Vlada Federacije BiH.

Zastupnički Dom Parlamenta Federacije Bosne i Hercegovine je na 7. izvanrednoj sjednici održanoj 29.01.2020. godine usvojio Prijedlog zakona o izmjenama i dopunama Zakona o porezu na dobit u tekstu kako ga je predložila Vlada Federacije BiH.

Prijedlog Zakona su razmatrala mjerodavna radna tijela i dostavila svoja izvješća.

Na Prijedlog zakona Amandman je podnio izaslanik Ramo Isak.

Vlada Federacije je dostavila izjašnjenje kojim je prihvatila Amandman.

Prijedlog Zakona je obrazložila predstavica Vlade Medina Dudo.

U pretresu su sudjelovali : Damir Marjanović, Aner Žuljević i Medina Dudo.

Na temelju rezultata glasovanja predsjedatelj je konstatirao da je Dom naroda Parlamenta Federacije Bosne i Hercegovine sa 43 glasa za, i jednim suzdržanim glasom usvojio Prijedlog zakona o izmjenama i dopunama Zakona o porezu na dobit sa sljedećim Amandmanom:

U članku 3. u stavku 2. Prijedloga zakona o izmjenama i dopunama Zakona o porezu na dobit, riječi: „po stopama iz stavka 2. ovoga članka“ se brišu, a iza riječi: „amortizuje“ dodaju se riječi: „kod najmoprimca“.

Prema tome, potrebno je da se Zastupnički dom izjasni o ovome Amandmanu.

5. Prijedlog Zakona o obrtu i srodnim djelatnostima u Federaciji Bosne i Hercegovine

Prijedlog Zakona o obrtu i srodnim djelatnostima je utvrdila Vlada Federacije BiH.

Zastupnički Dom Parlamenta Federacije Bosne i Hercegovine je na 4. sjednici održanoj 10. i 11. 9. 2019. godine usvojio Prijedlog Zakona o obrtu i srodnim djelatnostima u Federaciji Bosne i Hercegovine u tekstu kako ga je predložila Vlada Federacije BiH.

Prijedlog Zakona su razmatrala mjerodavna radna tijela i dostavila svoja izvješća.

Na Prijedlog zakona sedam amandmana je podnio Aner Žuljević.

Vlada Federacije je dostavila izjašnjenje kojim ne prihvata amandmane.

Prijedlog Zakona je obrazložio predstavnik Vlade Amir Zukić.

U pretresu je sudjelovao Igor Stojanović.

Tomislav Martinović je pozvao predstavnika Obrtničke komore FBiH Željka Babića da se obrati Domu naroda.

Usljedila je stanka, nakon čega je došlo do prekida sjednice.

Sjednica je prekinuta u 16.45 sati.

NASTAVAK SJEDNICE OD 27.2. 2020. GODINE

Sjednica je počela u 13:24 sati.

Sjednicom je predsjedao predsjedatelj Doma naroda Parlamenta FBiH Tomislav Martinović.

Na temelju evidencije Stručne službe Doma naroda predsjedatelj je konstatirao da sjedinici nazoči 44 izaslanika, što čini većinu pa Dom naroda može raditi i punovažno odlučivati.

Izočnost sjednici su opravdali: Drago Puzigaća, Sandra Imširović, Senad Alić, Mirela Trepanić, Senad Ahmetović, Ilija Nakić, Damir Džeba, Mladen Lonić, Slađan Ilić i Goran Broćeta.

Predsjedatelj je izvjestio izaslanike da su, između dva nastavka ove sjednice, vođene rasprave i diskusije sa obrtničkom komorom i resornim ministarstvom vezane za Prijedlog zakona o obrtu i srodnim djelatnostima Federacije BiH i da će Vlada Federacije dostaviti određene akte vezane za točku i predložio da se pređe na sljedeće točke, što su izaslanici prihvatili.

6. Nacrt zakona o elektronskom potpisu Federacije BiH

Nacrt zakona o elektronskom potpisu Federacije BiH je utvrdila Vlada Federacije BiH.

Zastupnički dom Parlamenta Federacije Bosne i Hercegovine je na 30. izvanrednoj sjednici održanoj 20.06.2018. godine razmatrao je i zaključkom prihvatio Nacrt zakona o elektronskom potpisu Federacije BiH.

Nacrt ovog zakona su razmatrala mjerodavna radna tijela i dostavila svoja izvješća.

Nacrt zakona je obrazložio predstavnik Federalnog ministarstva prometa i komunikacija Kenan Osmanagić.

U pretresu su sudjelovali Aner Žuljević, Tomislav Martinović i Kenan Osmanagić.

Na temelju rezultata glasovanja, predsjedatelj je konstatirao da je Dom naroda Parlamenta Federacije BiH je sa 41 glasom za i dva suzdržana glasa, usvojio sljedeći

ZAKLJUČAK

1. Dom naroda Parlamenta Federacije BiH prihvaća Nacrt zakona o elektronskom potpisu Federacije BiH i smatra da može poslužiti kao osnova za izradu prijedloga zakona.
2. Zadužuje se Vlada FBiH da prilikom izrade prijedloga zakona ima u vidu primjedbe, prijedloge i sugestije koje su iznesene i dostavljene do izrade prijedloga zakona.

7. Nacrt zakona o izmjenama i dopunama Zakona o privrednim društvima

Nacrt zakona utvrdila je Vlada Federacije BiH.

Zastupnički dom Parlamenta Federacije Bosne i Hercegovine je na 30. izvanrednoj sjednici održanoj 20.06.2018. godine razmatrao i zaključkom prihvatio Nacrt zakona o izmjenama i dopunama Zakona o privrednim društvima.

Nacrt ovog zakona su razmatrala mjerodavna radna tijela i dostavila svoja izvješća.

Nacrt zakona je obrazložila predstavnic Federalnog ministarstva energije, rudarstva i industrije Jasmina Pašić.

U pretresu nije nitko sudjelovao.

Na temelju rezultata glasovanja predsjedatelj je konstatirao da je Dom naroda Parlamenta Federacije BiH sa 39 glasova za i uz dva suzdržana glasa, usvojio sljedeći

ZAKLJUČAK

1. Dom naroda Parlamenta Federacije BiH prihvaća Nacrt zakona o izmjenama i dopunama Zakona o gospodarskim društvima i smatra da može poslužiti kao osnova za izradu prijedloga zakona.
2. Zadužuje se Vlada FBiH da prilikom izrade prijedloga zakona ima u vidu primjedbe, prijedloge i sugestije koje su iznesene i dostavljene do izrade prijedloga zakona.

8. Nacrt zakona o podršci porodicama sa djecom u Federaciji BiH

Nacrt zakona utvrdila je Vlada Federacije BiH.

Zastupnički dom Parlamenta Federacije Bosne i Hercegovine je na 1. redovitoj sjednici održanoj 28.2.2019. godine razmatrao i zaključkom prihvatio Nacrt zakona o podršci porodicama sa djecom u Federaciji BiH.

Nacrt ovog zakona su razmatrala mjerodavna radna tijela i dostavila svoja izvješća.

Nacrt zakona je obrazložio predstavnik Vlade FBiH Miroslav Jurešić.

U pretresu su sudjelovali: Boris Krešić, Segmedina Srna-Bajramović, Dževad Hadžić, Zdenka Džambas, Zvonko Marić, Aner Žuljević, Senad Čeljo, predsjednik Kluba izaslanika bošnjačkog naroda Jasmin Duvnjak i Vesko Drljača.

Na temelju rezultata glasovanja, predsjedatelj je konstatirao da je Dom naroda Parlamenta Federacije BiH sa 40 glasova za i uz dva suzdržana glasa usvojio sljedeći

ZAKLJUČAK

1. Dom naroda Parlamenta Federacije BiH prihvaća Nacrt zakona o podršci porodicama sa djecom u FBiH i smatra da može poslužiti kao temelj za izradu prijedloga zakona.
2. Zadužuje se Vlada FBiH da organizuje i provede javnu raspravu u trajanju od 90 dana.
3. Sukladno procedurama predviđenim Ustavom Federacije BiH za donošenje Zakona i zajedničkih mjerodavnosti federalne vlasti i kantona zadužuje se Stručna služba Doma naroda Parlamenta FBiH da ovaj zaključak i Nacrt zakona o podršci porodicama s djecom u FBiH dostavi kantonalnim skupštinama. Pozivaju se kantonalne skupštine da daju mišljenje u roku od 90 dana od dana dostave zaključka.
4. Zadužuje se predlagatelj da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma naroda FBiH i iznesene u javnoj raspravi.

9. Nacrt zakona o reprezentativnosti Sindikata i udruga poslodavaca

Nacrt zakona utvrdila je Vlada Federacije BiH.

Zastupnički dom Parlamenta Federacije Bosne i Hercegovine je na 7. redovitoj sjednici održanoj 29.10.2019. godine razmatrao i zaključkom prihvatio Nacrt zakona o reprezentativnosti Sindikata i udruženja poslodavaca.

Nacrt ovog zakona su razmatrala mjerodavna radna tijela i dostavila svoja izvješća.

Nacrt zakona je obrazložio federalni ministar Vesko Drljača.

U pretresu su sudjelovali: Dževad Hadžić, Zdenka Džambas, Zvonko Marić, Jasmin Duvnjak, Damir Marjanović, Aner Žuljević i Vesko Drljača.

Nakon pretresa se glasovalo o Nacrtu zakona.

Na temelju rezultata glasovanja, predsjedatelj je konstatirao da Dom naroda Parlamenta Federacije BiH nije prihvatio Nacrt zakona o reprezentativnosti Sindikata i udruga poslodavaca, jer je za glasovalo 25 glasova, tri izaslanika su bila suzdržana, a sedam izaslanika je bilo protiv.

Budući da je izražena sumnja u rezultate glasovanja, pristupilo se pojedinačnom glasovanju koje je obavio Izmir Hadživić, tajnik Doma naroda Parlamenta Federacije BiH.

Na temelju rezultata pojedinačnog glasovanja predsjedatelj je konstatirao da je Dom naroda Parlamenta Federacije BiH sa 30 glasova za, tri suzdržana glasa i devet glasova protiv, usvojio sljedeći:

ZAKLJUČAK

1. Dom naroda Parlamenta Federacije BiH prihvaća Nacrt zakona o reprezentativnosti Sindikata i udruga poslodavaca i smatra da može poslužiti kao temelj za izradu prijedloga zakona.
2. Zadužuje se Vlada FBiH da organizuje i provede javnu raspravu u trajanju od 60 dana.
3. Sukladno procedurama predviđenim Ustavom Federacije BiH za donošenje Zakona i zajedničkih mjerodavnosti federalne vlasti i kantona zadužuje se Stručna služba Doma naroda Parlamenta FBiH da ovaj zaključak i Nacrt zakona o reprezentativnosti Sindikata i udruženja poslodavaca dostavi kantonalnim skupštinama.
4. Zadužuje se predlagatelj da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma naroda FBiH i iznesene u javnoj raspravi.

Prijedlog Zakona o obrtu i srodnim djelatnostima.

Predsjedatelj je podsjetio izaslanike da je rasprava o ovoj točki završena i da je Vlada Federacije podnijela Amandman na Prijedlog ovog zakona, koji je postao sastavni dio Prijedloga zakona. Amandman se odnosi na članak 46. stavak 4. Prijedloga zakona.

Izaslanicima se obratio federalni ministar poduzetništva, razvoja i obrta Amir Zukić i izjavio da je Vlada Federacije podnijela Amandman koji glasi:

„U članku 46. stavak (4) mijenja se i glasi:

(4) Članarina iz stava (3) ovog člana, na mjesečnom nivou, se ne može propisati u iznosu većem od 0,50% od osnovice za obračun doprinosa za prethodnu godinu koju objavljuje Federalno ministarstvo financija.“.

Vlada FBiH je odbila amandmane izaslanika Anera Žuljevića.

Izaslanik Aner Žuljević je zatražio pojedinačno izglasavanje o svakom amandmanu.

Amandman I:

Dodaje se članak koji glasi:

Članak 18.

(Obrtnica)

- (1) Za obavljanje obrta, obrtnik mora imati obrtnicu, koja je, u smislu ovog zakona, odobrenje za rad.
- (2) Po upisu u Obrtni registar obrtnička komora kantona (u daljem tekstu: kantonalna komora) na čijem teritoriju se nalazi sjedište obrta obrtniku izdaje obrtnicu.
- (3) Obrtnica se izdaje u dvije veličine od kojih je veću obrtnik dužan izložiti u sjedištu obrta, na vidnom mjestu.
- (4) Izdaju i distribuciju obrtnica kantonalnim komorama, u skladu sa stavkom (6) ovog članka, vrši Komora.
- (5) Cijenu obrtnice određuje Skupština Komore i ne može iznositi više od 3% prosječne plate u Federacije Bosne i Hercegovine obračunate u prethodnoj kalendarskoj godini.
- (6) Sadržaj i oblik obrtnice pravilnikom propisuje Ministar.

Na temelju rezultata glasovanja predsjedatelj je konstatirao da je amandman I dobio potrebnu većinu budući da je 30 izaslanika glasovalo za, uz osam suzdržanih glasova i četiri glasa protiv.

Amandman II – predsjedatelj je konstatirao da ovaj amandman nije dobio potrebnu većinu budući da je 27 izaslanika glasovalo za, uz devet suzdržanih glasova i dva glasa protiv.

Amandman III – na temelju rezultata glasovanja predsjedatelj je konstatirao da ni ovaj amandman nije dobio potrebnu većinu jer je 26 izaslanika glasovalo za, uz 13 suzdržanih glasova i dva glasa protiv.

Budući da je izaslanik Aner Žuljević, koga su podržala dva izaslanike, izrazio sumnju u rezultate glasovanja po amandmanu III, pristupilo se pojedinačnom glasovanju koje je obavio tajnik Doma naroda Izmir Hadživdić.

Nakon obavljenog pojedinačnog izjašnjavanja predsjedatelj je konstatirao da amandman III nije dobio potrebitu većinu iz razloga što su 22 izaslanika glasala za uz 40 suzdržanih glasova i jedan glas protiv.

Amandman IV – na temelju rezultata glasovanja predsjedatelj je konstatirao da ni ovaj amandman nije dobio potrebitu većinu. Za je glasovalo 17 izaslanika, 21 izaslanik je bio suzdržan i jedan je glasao protiv.

Amandman V – na temelju rezultata glasovanja predsjedatelj je konstatirao da ni ovaj amandman nije dobio potrebitu većinu. Za je glasovalo 16 izaslanika, 21 izaslanik je bio suzdržan i dva su glasala protiv.

Amandman VI – na temelju rezultata glasovanja predsjedatelj je konstatirao da Dom naroda Parlamenta FBiH nije usvojio ovaj amandman budući da je 16 izaslanika glasovalo za uz 23 suzdržana glasa i tri glasa protiv.

Amandman VII – kako je 16 izaslanika glasovalo za uz 22 suzdržana glasa i dva glas protiv, predsjedatelj je konstatirao da ni ovaj amandman nije dobio potrebitu većinu.

Predsjednik Kluba izaslanika bošnjačkog naroda Jasmin Duvnjak je tražio stanku od 10 minuta.

Nakon stanke pristupilo se glasovanju o prijedlogu ovog zakona, a isti nije dobio potrebitu većinu jer je 27 glasovalo za, uz pet suzdržanih glasova i šest glasova protiv.

Jasmin Duvnjak je izrazio sumnju u rezultate glasovanja i zahtijevao pojedinačno izjašnjavanje u čemu su ga podržala još dva izaslanika.

Tajnik Doma naroda Parlamenta FBiH Izmir Hadžić je izvršio pojedinačnu prozivku radi utvrđivanja pojedinačnog glasovanja, a predsjedatelj je konstatirao da Dom naroda PFBiH nije usvojio ovaj prijedlog zakona budući da je 29 izaslanika glasovalo za, uz pet suzdržanih glasova i osam glasova protiv.

10. Izvješće o odobravanju izdvajanja sredstava iz tekuće rezerve Vlade Federacije BiH budžeta za 2019. godinu zarazdoblje 1.01.2019.-30.06.2019.

Izvješće je dostavila Vlada Federacije.

Zastupnički Dom Parlamenta Federacije Bosne i Hercegovine je na 8. redovitoj sjednici održanoj 20.11.2019. godine prihvatio Izvješće o odobravanju izdvajanje sredstava iz tekuće rezerve za 2019. godinu, za razdoblje od 1.01.2019. do 30.06.2019.

Izaslanicama se obratila Jelka Miličević, federalna ministrica financija.

U pretresu su sudjelovali: Aner Žuljević, Damir Marjanović i Jelka Miličević, federalna ministrica financija.

Na temelju rezultata glasovanja, predsjedatelj je konstatirao da Dom naroda Parlamenta Federacije BiH nije prihvatio Izvješće o odobravanju izdvajanja sredstava

iz tekuće rezerve za 2019. godinu, za razdoblje od 1.01.2019. do 30.06.2019. godine, jer je za glasovalo 23 izaslanika, osam izaslanika je bilo suzdržano a sedam izaslanika je bilo protiv.

11. Izvješće o radu i poslovanju BH Gas d.o.o Sarajevo za 2017. godinu Izvješće o radu i poslovanju BH Gas d.o.o Sarajevo za 2018. Godinu

Izvješća je Parlamentu Federacije dostavio BH Gas d.o.o Sarajevo.

Zastupnički Dom Parlamenta Federacije Bosne i Hercegovine je na 8.redovitoj sjednici održanoj 20.11.2019. godine prihvatio Izvješće o radu i poslovanju BH Gas d.o.o Sarajevo za 2017. godinu i Izvješće o radu i poslovanju BH Gas d.o.o Sarajevo za 2018. godinu.

Izvješća je obrazložio Jasmin Salkić, predstavnik BH Gas d.o.o Sarajevo.

U pretresu su sudjelovali: Zvonko Marić, Damir Marjanović i Aner Žuljević.

Pristupilo se glasovanju o Izvješću o radu i poslovanju BH Gas d.o.o Sarajevo za 2017. godinu i Izvješću o radu i poslovanju BH Gas d.o.o Sarajevo za 2018. godinu. Na temelju 25 glasova izaslanika za, uz tri suzdržana glasa i sedam glasova protiv, predsjedatelj je konstatirao da ova izvješća nisu dobila potrebitu većinu.

Izaslanik Ramo Isak je izrazio sumnju u rezultate glasovanja. Tajnik Doma naroda Parlamenta FBiH Izmir Hadžiaudić je izvršio pojedinačnu prozivku.

Na temelju rezultata glasovanja predsjedatelj je konstatirao da sa 28 glasova za, devet suzdržanih i tri glasa protiv izvješća o radu i poslovanju BH Gas d.o.o Sarajevo za 2017. i 2018. godinu nisu dobila potrebitu većinu.

Stavljen je na glasovanje zaključak kojeg je predložio izaslanik Zvonko Marić.

Na temelju rezultata glasovanja predsjedatelj je konstatirao da je Dom naroda Parlamenta Federacije BiH sa glasom za , uz pet suzdržanih glasova i dva glasa protiv usvojio sljedeći

ZAKLJUČAK

Dom naroda Parlamenta Federacije Bosne i Hercegovine zadužuje Vladu Federacije da pruži svu neophodnu potporu „BH Gas“, d.o.o. Sarajevo u procesu razvoja i realiziranja Projekta Južna interkonekcija i da u parlamentarnu proceduru dostavi Nacrt zakona o Južnoj interkonekciji.

12. Godišnje izvješće o poslovanju JP Ceste Federacije BiH d.o.o Sarajevo za 2018. godinu

Izvješće je dostavilo JP Ceste Federacije BiH d.o.o Sarajevo.

Zastupnički Dom Parlamenta Federacije Bosne i Hercegovine je na 8. redovitoj sjednici održanoj 20.11.2019. godine usvojio Godišnje izvješće o poslovanju JP Ceste Federacije BiH d.o.o Sarajevo za 2018. godinu.

U pretresu nije nitko učestvovao.

Na temelju rezultata glasovanja sa 27 glasova za i pet suzdržanih glasova, ovo izvješće nije dobio potrebitu većinu.

Za riječ se javio predsjednik Kluba izaslanika hrvatskog naroda Ivo Tadić izrazivši sumnju u rezultate glasovanja te je zahtijevao da se pristupi pojedinačnom glasovanju.

Tajnik Doma naroda Parlamenta FBiH Izmir Hadžić je izvršio pojedinačnu prozivku. Na temelju rezultata poimeničnog glasovanja ustanovljeno je da je ovo izvješće dobilo potrebitu većinu sa 33 glasa za, sedam suzdržanih glasova i bez glasova protiv.

13. Godišnje izvješće Visokog sudbenog i tužiteljskog vijeća za BiH za 2018. godinu

Izvješće je dostavilo Visoko sudbeno i tužiteljsko vijeće BiH.

Zastupnički dom Parlamenta Federacije Bosne i Hercegovine je na 8. redovitoj sjednici održanoj 20.11.2019. godine primio k znanju godišnje izvješće Visokog sudbenog i tužiteljskog vijeća za BiH za 2018. godinu, a tom prilikom usvojen je i zaključak.

Izvješće je obrazložio Slavo Lakić, predstavnik Visokog sudbenog i tužiteljskog vijeća BiH.

U pretresu je sudjelovao Aner Žuljević.

Kako se radi o materijalu koji je dostavljen radi informiranja predsjedatelj je konstatirao da je Dom naroda Parlamenta Federacije BiH Godišnje izvješće Visokog sudbenog i tužiteljskog vijeća za BiH za 2018. godinu primio k znanju.

14. Izbor i imenovanja

Za ovu točku dnevnog reda nije bilo predloženih materijala.

Sjednica je završila sa radom u 17:36 sati.

* * *

Transkript sjednice čini sastavni dio Zapisnika.

TAJNIK
Izmir Hadžić

PREDSJEDATELJ
Tomislav Martinović

